

四庫全書

集部

欽定四庫全書

唐詩紀事卷二十六

宋 計敏夫 撰

盧象

閻防

王季友

楊賁

張陵

王之渙

李陽冰

蘇渙

劉長卿

章八元

李穆

韋應物

朱放

孫逖

李紆

盧象

象題叔徵君東谿草堂云關山十餘里青壁森相倚欲

識堯時天東谿白雲是雷聲轉幽壑雲氣香流水澗影  
生蟲蛇巖端翳梓杞大道終不易君恩曷能已鶴羨無  
老時龜言攝生理浮年笑六甲元化潛一指未暇掃雲  
梯空慙阮家子

又云今朝共遊者得性閑未歸已到仙人家莫驚鷗鳥  
飛水深巖公釣松挂巢父衣雲氣轉幽寂谿流無是非  
名理未足羨腥臊詎所稀自惟負真意何歲當食薇  
象自江東止田園移莊慶會未幾歸汶上小弟幼妹尤

悲其別賦詩云謝病始告歸依然入桑梓家人皆佇立  
相候衡門裏疇類皆長年成人舊童子上堂家慶畢願  
與親嫻適論舊或餘悲思存且相喜田園轉蕪沒但有  
寒泉水衰柳日蕭條秋光清邑里入門乍如客休騎非  
便止中飲顧王程離憂從此始兩妹日長成雙鬢將及  
人已能持寶瑟自解掩羅巾念昔別時小未知踈與親  
今來識離恨掩淚方殷勤小弟更孩幼歸來不相識同  
居雖漸慣見人猶默默宛作越人言殊鄉甘水食別此

最為難淚盡有餘憶

劉夢得董挺詩集序云嘗所遊皆青雲之士聞名如盧

杜員外象

工部甫高韻如包李

祭酒吉侍郎紆

迭以章句揚於當時

商璠云象詩雅而不素有大體得國士之風曩在校書  
名光秘閣其如靈越山多秀新安江甚清蓋東南之數  
郡也

竹里館云江南冰不開山澤氣潛通臘月聞山鳥寒崖  
見蟄熊柳林青半合荻笋亂無叢回首金陵岸依依向

北風

送祖詠云田家宜伏臘歲晏子言歸石路雪初下荒村  
雞共飛東原多煙火北澗隱寒暉滿酌野人酒倦聞鄰  
女機胡為困樵採幾日被朝衣

贈張筠員外云公門世業昌才子冠裴王出自平津邸  
還為吏部郎神仙餘氣色列宿動輝光夜直南宮靜朝  
趨北禁長時人窺冰鑑明主賜衣裳翰苑飛鸚鵡天池  
待鳳凰承歡疇日顧未記後時傷去去圖南遠微才幸

不忘

趙都護晏別云結髮候旌麾元戎復在斯門開都護府  
兵動羽林兒黠虜多翻覆謀臣有別離智同天所授恩  
共日相隨漢使開賓幕胡笳送酒卮風霜迎馬首雨雪  
事魚麗上策應無戰深情屬載馳不應行萬里明主寄  
安危

象字緯卿劉夢得紀其文云公始以章句振起于開元  
中與王維崔顯比肩驥首鼓行於時妍詞一發樂府傳

貴由前進士補秘書郎轉右衛倉曹掾丞相曲江公方  
執文衡揣摩後進得公深器之擢為左補闕河南府司  
錄司勳員外郎名盛氣高少所卑下為飛語所中左遷  
齊汾鄭三郡司馬入為膳部員外郎大盜起幽陵入洛  
師執公脅之從伍中謫果州長史又貶永州司戶移吉  
州長史詔拜主客員外郎道病留武昌遂不起故相崔  
太傅時為右史方作鄂以文誌其墓其詞曰噫公妙年  
有聲振耀當代翱翔雲路不虞增繳盛名先物易生疵



癘三至郎省坐成遺耄蹢躅江皋栖栖沒齒見知者恨之

閩防

百丈谿新理茅茨讀書云浪迹棄人世還山自幽獨始  
傍巢由蹤吾其獲心曲荒庭何所有老樹半空腹秋蛸  
鳴北林暮鳥穿我屋栖遲樂遵渚恬曠寡所欲開卦推  
盈虛散帙攻節目養閑廢人事達命知止足不學東國  
儒俟時勞伐輻

防與薛據在終南山豐得寺讀書韋蘇州有城中卧疾

和閻薛二子屢從邑令飲詩云車

一作良

馬日蕭蕭胡不

住

一作在

我廬方來從令飲卧病獨何如秋風起漢

一作江

臯開戶望平蕪即此愴

一作稀

音素

一作表

焉知中密踈渴

者不思火寒者不求水人生羈寓

一作旅

時去就當如此

猶希心異跡

一作從利迹異

眷眷存終始

防在開元天寶間有文稱岑參孟浩然韋蘇州有贈章

然不知得罪謫長沙之故也

商璠云防為人好古博雅其詩警策語多真素至如荒  
庭何所有老樹半空腹又若熊蹯庭中樹龍蒸棟裏雲  
皎然信也

秋晚石門禮佛云輕策凌絕壁招提謁金仙舟車無由  
徑嵯嶠乃屬天躑躅淹景夷猶望新弦石門變暝色  
谷口生人煙陽雁叫平楚秋風急寒川馳暉苦代謝浮  
脆斲貞堅永欲卧邱壑息心依梵筵誓將歷劫願無以  
外物牽

宿岸道人精舍云早歲參道風放情已寥廓重息知心  
侶遂果巖中諾歛跡辭人間杜門守寂寞秋風剪蘭蕙  
霜氣冷淙澗山牖見燃燈竹房聞擣藥願言捨塵事所  
趣非龍蠖

夕次鹿門山云龐公嘉遯所浪跡難追攀浮舟暝始至  
抱杖聊自閑雙巖開鹿門百谷集珠灣噴薄湍上水春  
容漂裏山焦原足險峻梁壑未成艱我行自春仲夏鳥  
語綿蠻意草色已晚客心殊未還遠遊非避地訪道愛

童顏安能夠機巧爭奪錐刀間

與永樂諸官夜泛黃河云煙深載酒入但覺暮川虛映  
水見山火鳴榔聞夜漁愛茲川上趣忽與世人疎無假  
燃官燭中流有望舒

孟浩然湘中旅泊寄防云桂水通百粵扁舟期曉發荆  
雲閉三邑夕望不見家裏王夢行雨才子謫長沙長沙  
饒瘴癘胡為久留滯久別思歡顏承歡懷接袂接袂香  
無由徒增旅泊愁清猿不可聽沿月上湘流

王季友

古塞曲云進軍飛狐北窮寇勢將變日落沙塵昏背河  
更一戰驛馬黃金勒雕弓白羽箭射殺左賢王歸秦未  
央殿欲言塞下事天子不召見東出咸陽門哀哀淚如  
霰

觀于舍人壁畫山水云野人宿在人家少朝見此山謂  
山曉半壁仍棲嶺上雲開簾放出湖中鳥獨坐長松是  
阿誰再三招手起來遲于公大笑向予說小弟丹青能

雨為

還山留別長安知己云出山不見家還山見家在山前  
是門前此去長樵採青溪誰招隱白髮自相待唯伴澗  
底松依色不改

宿東溪李十五山亭云上山下山入溪谷溪中落日留  
我宿栢樹依依當主人不在情亦足花石出地兩  
重階絕頂平天一小齋本意猶來是山水何用相逢憶  
舊懷

寄韋子春云出山秋雲曙山木已再春食我山中藥不  
憶山中人山中誰余客白髮惟相親雀鼠晝夜無知我  
厨廩貧依依北舍松不厭吾南隣有情皆棄捐土石為  
同身

子美為李友作可歎行云近者抉眼去其夫河東女兒  
身姓柳丈夫正色動引經鄴城客子王季友豫章太守  
高帝孫引為賓客敬頗久時危可拔真豪傑二人可置  
君側否



商璠云李友詩放蕩愛奇務險遠出常情之外然而白  
首短褐良可悲乎至如觀于舍人西亭壁畫山水云野  
人宿在人家少朝見此山謂山曉半壁仍棲嶺上雲開  
簾放出湖中鳥甚有新意也

李友肅代間詩人也錢考功起有贈李友赴洪州幕下  
詩云列郡皆用武南征所從誰諸侯重才略見子如瓊  
枝乃知李友曾遊江西之幕

郎士元酬李友半日村別業兼呈李明府云村映寒原

日已斜煙生密竹早歸鴉長溪南路當羣岫半景東鄰  
照數家門通小徑連芳草馬飲凍泉踏淺沙欲待主人  
林上月還思潘令縣中花

岑參潼關使院懷王七季友云王生今才人時輩咸所  
仰何當見顏色終日勞夢想驅車到關下欲往阻河廣  
滿目徒春華思君罷心賞開門見太華朝日映高掌忽  
覺蓮華峰別來更如長無心顧微祿有意在獨往不負  
林中期終當出塵網

楊賁

賁時興詩云貴人昔未貴咸願顧寒微及自登樞要何  
曾問布衣平明登紫閣日晏下彤闈擾擾路旁子無勞  
歌是非

賁登天寶三年第

張陵

今日漢家探使回蟻壘邊兵未歇春風渭水不敢流  
總作六軍心上血

陵天寶間詩人也

王之渙

九日送別云  
薊庭蕭索故人稀  
何處登高且送歸  
今日暫同芳菊酒  
明朝應作斷蓬飛

出塞詩云  
黃河直上白雲間  
一片孤城萬仞山  
羌笛何須怨楊柳  
春光不過玉門關

登鸛鵲樓云  
白日依山盡  
黃河入海流  
欲窮千里目  
更上一重樓

之渙并州人與兄之咸之賁皆有文天寶間人樂天作  
滁州刺史鄭昉墓誌云與王昌齡王之渙崔國輔聯唱  
迭和名動一時

送別云楊柳東門樹青青夾御河近來攀折苦應為別  
離多

李陽冰

陽冰阮客舊居詩云阮客身何在仙雲洞口橫人間不  
到處今日此中行

阮客縉雲  
之隱者也

陽冰善篆曾宰當塗太白依之

蘇渙

渙有癡律詩云日月東西行照在大荒北其中有燭龍  
靈怪人莫測開目為晨暉閉目為夜色一開復一閉明  
晦無休息居然六合內曠哉天地德天地且不言世人  
強喧喧

毒蜂成一窠高掛惡木枝行人百步外目動魂亦飛長  
安大道旁挾彈誰家兒右手持金丸引滿無所疑一中

紛下來勢若風雲隨身如萬箭攢究轉迷所之徒有疾  
惡心奈何不知機

養蠶為素絲葉盡蠶不老傾筐對空牀此意向誰道一  
女不得織萬夫受其寒一夫不得意四海行路難禍亦  
不在大福亦不在先世路險孟門吾徒當勉旃

杜子美有聽蘇大侍御誦詩之作

高仲武云渙本不平者善攻白拏巴人號曰白跖實人  
患之以比莊蹻後自知非乃變節從學鄉試擢第遷御

史佐湖南使崔中丞權幕崔遇害渙遂踰嶺扇動哥舒  
晃跋扈交廣此猶蛟龍見血本質彰矣五年作變律詩  
十九首上廣州連率李公其意可歎答曰漢策紀蒯通  
說詞皇史錄祖君彥書檄此本所以容納夫善惡必書  
春秋顯訓名言渙者其殆庶幾乎豈但不棄雕蟲亦以  
深懲戒餘子也

渙以哥舒叛伏誅

劉長卿



字文房至監察御史以檢校祠部員外郎為轉運使判官知淮南鄂岳轉運留後鄂岳觀察使吳仲孺誣奏貶潘州南巴尉會有為之辨者除睦州司馬終隋州刺史以詩馳聲上元寶應間皇甫湜云詩未有劉長卿一句已呼宋玉為老兵矣語未有駱賓王一字已罵宋玉為罪人矣其名重如此

李嘉祐入睦州分水路憶長卿詩云北闕忤明主南方隨白雲沿洄灘草色應接海鷗羣建德潮已盡新安江

又分回省嚴子瀨朗詠謝安文雨過暮山碧猿吟秋日  
曛吳州不可到刷鬚為思君

高仲武云長卿員外有吏幹而犯上兩度遷謫皆自取  
之詩體雖不新奇甚能鍊飾十首已上語意稍同於落  
句尤甚此奇思銳穿也然春風吳草綠古木剡山深明  
日滄洲路歸雲不可尋又沙鷗驚小吏明月上高枝又  
細雨濕衣看不見閑花落地聽無聲裁長補短蓋王微  
之類歟又得罪風霜苦全生天地仁傷而不怨亦足以

發揮風雅矣

過張明府別業云寥寥東郭外白首一先生考滿孤琴  
在家移五柳成夕陽臨水釣春雨向田耕終日空林下  
何人識此情

餘干旅舍云搖落暮天迴青楓霜葉稀孤城向水閉獨  
鳥背人飛渡口月初上鄰家漁未歸鄉心正欲絕何處  
搥寒衣

送鄭公歸廬山云潯陽數畝宅歸卧掩柴關谷口何人

在門前秋草閑無機賣藥罷不語杖藜還舊筍成寒竹  
空齋向暮山水流過舍下雲去到人間桂樹花應發因

行寄一攀

自過張明府別業三篇姚合取為極元集

負譴後題于越亭云南天愁望絕亭上柳條新落日獨  
歸鳥孤舟何處人生涯投嶺徼世業臨邊塵江入千峰  
暮花連百越春秦臺憐白首楚水怨青蘋草色無征路  
鶯聲傍逐臣獨醒翻取笑直道不容身得罪風霜苦全  
生天地仁青山數行淚滄海一窮鱗流落誰相見空憐

鷗鷺親

楊大年最喜此篇

同郭參謀題崔令公庭竹云不學媚清瀾能依上將壇  
蒙籠低冕過青簷卷簾看得地移根遠經霜抱節難開  
花成鳳實嫩筍長漁竿藹藹軍容靜蕭蕭郡宇寬細音  
和角暮跡影上門寒阮巷何人在梁園幾處殘空餘軒  
屏側歲晚對任安

送朱山人越中賊退後歸山云越中初戰罷江上送歸  
橈南渡無來信西陵自落潮空城垂故柳舊葉發春苗

閭里稀相見鶯花共寂寥

送張扈司直歸越中云時危身赴難事往任浮沉萬里  
三江客孤城百戰心春風吳草綠古木剡山深明日滄  
洲路歸飛不可尋

陪鄭中丞園林宴諸姪云心遠親魚鳥功成厭鼓鼙林  
中阮家醉池上謝公題門徑蒼苔合窓陰綠篠低夕陽  
山向背秋草水東西舊架懸藤老踈籬挿槿齊風塵不  
可到唯羨武陵溪

送駱少府云汀洲芳草綠日暮更氛氲舊國無來信春  
江獨送君五言凌白雪六翮向青雲空自無機事沙鷗  
已可羣

送李中丞之襄州云流落征南將曾驅十萬師罷歸無  
舊業老去戀明時獨立三朝盛輕生一劍知茫茫江漢  
上日暮欲何之

送嚴士元云春風倚棹闔閭城水國猶寒陰復晴細雨  
濕衣看不見閑花落地聽無聲日斜江上孤帆影草綠

湖南萬里程東道若逢相識問青袍今已悞儒生

章八元

八元題慈恩塔云十層突兀在虛空四十門開面面風  
却怪鳥飛平地上自驚人語半天中迴梯暗踏如穿洞  
絕頂初攀似出籠落日鳳城佳氣合滿城春樹雨濛濛  
或云元白見其詩云不謂嚴維出此弟子

八元歸桐廬舊居寄嚴長史云昨辭天子棹歸舟家在  
桐廬憶舊邱三月暖時花競發兩溪分處水爭流近聞



江老傳鄉語遙見家山減旅愁或在醉中逢夜雪懷賢  
應向剡川遊

酬劉長卿月夜云夜涼河漢白卷箔出南軒過月鴻爭

遠辭枝葉暗翻獨謠聞麗曲緩步接清言宣室思前席

行省拜主恩

劉云貧家唯好  
月空愧子猷過

韋蘇州送八元擢第往上都應制云決勝文場戰已酣  
行應辟命復才堪旅食不辭遊闕下春衣未換報江南  
天邊宿鳥生歸思關外晴山滿夕嵐立馬欲從何處別

都門楊柳正氈毼

高仲武云八元嘗於郵亭偶題數句蓋激楚元以辭家  
維大異之遂親指喻數年克賦擢第至如雪晴山脊見  
沙淺浪痕交得山水狀貌也

八元睦州人登大歷進士第

八元新安江行詩云江源南去水野渡暫維梢古戍懸  
漁網空林露鳥巢雪晴山脊見沙淺浪痕交自笑無媒  
者逢人即解嘲

寄苗員外云舊宅平津邸槐陰接漢宮鳴騶馳道上見  
月直廬中白雪歌偏麗青雲官早通悠悠一縫掖千里  
限清風

李穆

劉長卿之壻也詩寄劉云處處雲山無盡時桐廬南望  
轉參差舟人莫道新安近欲上潺湲行自遲

時劉在新安郡劉

答云孤舟相訪自天涯萬轉雲山路更賒欲掃柴門迎  
客遠青苔黃葉滿貧家

長卿又送穆詩云渡口發梅花山中動泉脉蕪城春草  
生君作揚州客鴈還空渚在人去落湖翻臨水獨揮手  
殘陽歸掩門

狎鷗攜稚子釣魚終老身慙懃囑歸客莫話桃源人

韋應物

周道遙公夏之後待價生令儀令儀生鑾鑾生應物其  
詩言天寶時扈從遊幸事疑為三衛永泰中任洛陽丞  
京兆府功曹大歷十四年自扈縣令制除櫟陽令以疾

辭不就建中二年由比部外郎出刺滁州改刺江州追  
赴闕改左司郎中貞元初歷蘇州罷守寓蘇臺永定精  
舍

李肇國史補云開元後位卑而著名李北海邕王江寧

昌李館陶

鄭廣文虔

元魯山德秀

蕭功曹穎

張長史旭

獨孤常州及崔比部

梁補闕肅

韋蘇州其一也應物

仕宦本未似止于蘇案白傳蘇州答劉禹錫詩云敢有

文章替左司謂應物也官稱亦止此

郡齋雨中與諸文士燕集詩云兵衛森畫戟宴寢凝清

香海上風雨至逍遙池閣涼煩疴近

一作止

消散嘉賓復

滿堂自慚居處崇未覩斯民康理會是非遣性達形迹

忘鮮肥屬時禁蔬果幸見嘗俯飲一杯酒仰聆金玉章

神歡體自輕意欲凌風

一作雲

翔吳中盛文史羣彥今汪

洋方知大藩地

一作威

豈曰財賦強

應物性高潔所在焚香掃地而坐惟顧況劉長卿邱丹

秦系皎然之儔得廁賓列與之酬唱樂天吳郡詩石記

獨書兵衛森畫戟燕寢凝清香劉太真與韋書云顧著作來也以足下郡齋燕集相示是何情致暢茂道逸如此宋齊間沈謝吳何始精于理意然緣情體物備詩人之旨後之傳者甚失其源惟足下制其橫流師摯之始關雎之亂於足下之文見之矣

故人重九日求橘戲贈云憐君獨坐思新橘始摘猶酸亦未黃書後欲題三百顆洞庭須待滿林霜

樂天與元九書云近歲韋蘇州歌行才麗之外頗近興

諷其五言詩又高雅閑澹自成一家之體今之秉筆者誰能及之然當蘇州在時人亦未甚愛重必待身後然後貴之

欲持一瓢酒遠寄風雨夕

句

萬籟自生聽太空常寂寥

還從靜中起却向靜中銷

詠聲

山深松子落幽人應未眠

句

舟泊南池雨簾捲北樓風

句

右張為取作主客圖

應物寄全椒山中道士云今朝郡齋冷忽念山中客澗底束荊薪歸來煮白石欲持一瓢酒遠寄風雨夕落葉



遍空山何處尋行跡

應物郡齋雨中燕集顧況和詩云好鳥集嘉樹飛雨灑  
高城況與數君子列坐分兩楹文雅一何麗林堂含餘  
清我公未歸朝遊子不待情白雲帝鄉遠滄江桃葉鳴  
拜手欲無言零淚如酒傾寸心已摧折別離方骨驚安  
得凌風翰肅肅賓天京時況左遷饒州司士參軍故寓  
意於詩

朱放

一作  
做

剡溪行寄新別云潺湲寒溪上自此成離別回首望歸  
人移舟逢暮雪頻行識草樹漸老傷年髮唯有白雲心  
為向東山月

九日陪劉中丞宴送客云獨坐三臺妙重陽百越間水  
心觀遠俗霜氣入秋山不棄遺簪舊留寧辭落帽還仍聞  
西上客咫尺謁天顏

九日與楊凝崔淑期登江上山有故不往云欲從携手  
登高去一到門前意已無那得更將頭上髮學他年少

插茱萸

山中聽子規云幽人自愛山中宿又近葛洪丹井西窗  
中有箇長松樹半夜子規來上啼

亂後經淮陰岸云荒村古岸誰家在野水浮雲處處愁  
唯有河邊衰柳樹蟬聲相送到楊州

剡山夜月六言云月在沃洲山上人歸剡縣溪邊漠漠  
黃花覆水時時白鷺驚船

銅雀妓云恨唱歌聲咽愁翻舞袖遲西陵日欲暮是妾

斷腸時

經故賀賓客鏡湖道觀云已得歸鄉里逍遙一外臣那  
隨流水去不待鏡湖春雪裏登山屐林間漉酒巾空餘  
道士觀誰是學仙人

放字長通襄州人隱居剡溪嗣曹王臯鎮江西辟節度  
參謀貞元中召為左拾遺不就

送張山人云知君住處足風煙古寺荒村在眼前便欲  
移家逐君去唯愁未有買山錢

送著公歸越云誰能愁此別到越會相逢長憶雲門寺  
門前千萬峰石床埋積雪山路倒枯松莫學白道士無  
人知去蹤

戴叔倫早行寄放云山曉旅人去天高秋氣悲明河川  
上沒芳草露中滋此別又萬里少年能幾時心知剡溪  
路聊且寄前期

放答陸澧云松葉堪為酒春來釀幾多不辭山路遠踏  
雪也相過

毗陵留別云別離非一處此處最傷情白髮將青草相  
隨日日生

遊石澗寺云聞道幽深石澗寺不逢流水亦難知莫道  
山僧無伴侶獼猴長在古松枝

顧況贈放云野客歸時無四鄰黔婁別久按常貧漁樵  
舊路不堪入何處空山猶有人

嚴維贈放云昔年居漢水日醉習家池道勝跡長在名  
高身不知欲依天目住新自始寧移生事曾無長唯將

白接離

孫逖

逖河南人年十五崔齊公日用試土火爐賦援翰立成  
甫冠三擅甲科吏侍王邱試竹簾賦降階納拜待以殊  
禮其典誥也宰相張九齡倚據疵瑕沉吟久之不能易  
一字公除庶子苑咸草詔曰西掖掌綸朝推無對張說  
命二子施伯仲之禮江夏李邕自陳州入計繕錄其集  
詣公託知己之分可謂人文之宗師國風之哲匠也已

顏真卿  
序其文  
逝終刑部侍郎

和登會稽山云稽山碧湖上勢入東溟盡煙景晝清明  
九峰爭隱嶙望中厭朱紱俗內探玄牝野老聽鳴騶山  
童擁行軫仙花寒未落古蔓柔堪引竹澗入山多松崖  
向天近雲從海天去日就江村隕能賦邱嘗聞和歌參  
不敏冥搜信冲漠多士期標準願奉濯纓心長謠入招  
隱

奉和左司員外自洛使入京中路先赴長安逢立春日



贈韋侍郎等諸公云拜郎登省闈奉使馳車乘遙瞻使  
者星便是郎官應臺妙時放言皇華德彌稱一陝聽風  
謠三秦望形勝此中睽益友是日多詩興寒盡歲陰催  
春歸日華證

忽覩雲間數雁迴更逢山上正花開河邊淑氣迎芳草  
林下輕風待落梅秋憲府中高唱入春卿署裏和聲來  
共言東閣招賢地自有西征謝傳才

揚子江樓云揚子何年邑雄圖作楚關江連二妃渚雲

近八公山驛道青楓外人煙綠嶼間晚來潮正滿數處落帆還

李紆

字仲舒大歷初李李卿薦為左補闕德宗時終吏侍李嘉祐有元日無衣冠入朝詩寄再從弟補闕紆

獨孤及見元載求正字元知其所歡迎謂曰誰堪制誥及心知不我與乃薦紆時楊炎在閣下忌及故也

李嘉祐自蘇臺至望驛亭人家盡空春物增思悵然有

卷二十一  
作寄從弟紆云南浦菰蔣覆白蘋東吳黎庶逐黃巾野  
棠自發空流水江燕初歸不見人遠樹依依如送客平  
田渺渺獨傷春那堪迴首長洲苑烽火年年報塞塵  
戴叔倫寄中書李舍人紆云萍翻蓬自卷不共本心期  
復入重城裏頻看百草滋水流歸思遠花發長年悲盡  
日春風起無人見此時

唐詩紀事卷二十六

欽定四庫全書

唐詩紀事卷二十七

宋 計敏夫 撰

于逖

姚係

趙徵明

李泌

褚朝陽

蕭昕

張潮

暢當

暢諸

獨孤及

皇甫冉

皇甫曾

李幼卿

趙驊

賈邕

劉舟

長孫鑄

房白

元晟

劉太冲

姚發

鄭愕

殷少野

鄔載

于逖

獨孤及李白皆有詩贈之蓋天寶間詩人也

憶舍弟云衰門鮮兄弟兄弟惟兩人飢寒各流浪感念  
傷我神夏期秋未來安知無他因不怨別天長但願見  
爾身茫茫天地間萬類各有親安知汝與我乖異同胡  
秦何時對形影憤懣當共陳

野外作云老病無樂事歲秋悲更長窮郊日蕭索生意  
已蒼黃小弟髮亦白兩男俱不强有才且未達况我非

賢良幸有朽鈍姿  
野外老風霜寒鴉噪  
晚景喬木思故鄉  
魏人宅蓬池結網  
佇鱸魴水清魚不來  
歲暮空彷徨

姚係

係送周愿判官歸嶺南  
云早蟬望秋鳴夜吟  
怨離聲眇然多異感  
值子江山行由來重  
義人感激事縱橫  
往復念遐阻淹留慕  
平生晨奔九衢餞  
幕始萬里程山驛風  
月樹海門煙霞城  
易綃泉源近拾翠  
沙溆明蘭蕙一為  
贈貧交空復情

西京遇舊識兼送往隴西詩云蟬鳴一何急日暮秋風  
樹卽此不勝愁隴陰人更去相逢與相失共是亡羊路  
韋蘇州送係還河中詩云上國旅遊罷故園生事微風  
塵滿路起行人何處歸留意芳樹飲惜別暮春暉幾日  
投關郡河山對掩扉

送陸渾主簿趙宗儒之任云山中眇然意此意乃平生  
常日望鳴臯遙對洛陽城故人吏為隱懷此若蓬瀛夕  
氣冒巖上晨流瀉岍明存亡區中事影響羽人情溪寂

值猿下雲歸聞鶴聲及茲春始暮花萼正明榮會有携  
手日悠悠去無程

楊叅軍庄送宇文邈云秋雲冒原隰野鳥滿林聲愛此  
田舍事稽君車馬程離堂慘不喧脉脉復盈盈蘭葉一  
經霜香綃為贈輕燈炷耿方寂蟲思隱餘清相望忽無  
際如含江海情

五老峯大明觀贈隱者云雲觀此山北與君携手稀林  
端涉橫水洞口入斜暉頗覺驚鶴邇忽為煙霧飛故人



清和客默會琴心微丹術幸可授青龍當未歸悠悠平生  
生意此日復相違

趙徵明

思歸云為別未幾日去日如三秋猶疑望可見日日上  
高樓唯是分手處白蘋滿芳洲寸心寧死別不忍生離  
憂

回軍跋者詩云既老又不全始得離邊城一枝假枯木  
步步向南行去時日一百來時一月程常恐道路傍掩

棄狐兔塋所願死鄉里到日不願生聞此哀怨詞念念  
不忍聽惜無異人術倏忽具爾形

李泌

奉和聖製重陽賜會聊示所懷云大唐造昌運品物荷  
時成乘秋逢令節錫宴歡羣情俯臨秦山川高會漢公  
卿欠一韻未追赤松子且泛黃菊英賡歌聖人作海內同

休明

奉和聖製中和節曲江宴百寮云風俗時有變中和節

惟新軒車雙闕下宴會曲江濱金石何鏗鏘簪纓亦紛  
綸皇恩降自天品物感知春慈恩匝寰瀛歌詠同君臣

欠一  
韻

泌字長源相德宗以上已九日皆大宴集而寒食上已  
多同時欲以二月名節泌請廢正月晦以二月朔為中  
和節因賜大臣戚里尺謂之裁度里閭釀宜春酒百官  
進農書以示務本帝乃著令與上已九日為三令節中  
外皆賜緡錢燕會

鄴侯家傳云泌賦詩譏楊國忠曰青青東門柳歲宴復  
憔悴國忠訴于明皇上曰賦柳為譏卿則賦李為譏朕  
可乎

褚朝陽

五絲詩云越人傳楚俗截竹競縈絲水底深休也日中  
還賀之章施文勝質列匹美於姬錦繡侔新段羔羊寢  
舊詩但誇端午節誰薦屈原詞把酒時伸奠汨羅空遠  
而

朝陽登天寶進士第

蕭昕

臨風舒錦云麗錦足云終檐檐展向風花開翻覆翠色  
亂動搖紅縷散悠颺裏文迴照灼中低垂疑步障吹起  
作晴虹既與邛遲夢深知卓氏功還鄉將制服從此表  
亨通

昕字中明再中博學宏詞科初為哥舒翰掌書記翰敗  
僂道走蜀肅宗立奉誥冊至行在代宗狩陝昕由武關

從帝德宗出奉天時為工部尚書年八十餘步至奉  
天後兼禮部尚書知貢舉以太子少師致仕

張潮

小長干行云憶昔深閨裏煙塵不曾識嫁與長干人沙  
頭候風色三月南風興思君下江陵八月秋風起看君  
發揚子去時悲如何見少別離多湘潭幾人到妾夢常  
風波

又云昨夜狂風度吹折江頭樹  
瑟瑟暗無邊行人在何

處好乘浮雲往佳期蘭渚東鴛鴦綠浦上翡翠錦屏中  
自憐十五餘顏色桃花紅那作商人婦愁水復愁風

詩二

太白集中有  
之未知誰是

江行風云壻貧如珠玉壻富如埃塵貧時不忘舊富日  
多寵新妾本富家女與君為偶匹念汝一何深中門不  
曾出妾有繡衣裳歲蕤金縷光念君貧且賤易此從遠  
方遠方三千里發竟悔不已日暮情更來空望去時水  
孟夏麥始秀江上多南風商賈歸欲盡君今尚巴東已

東有巫山窈窕神女顏常恐遊此方果然不知還

潮丹朝人大歷時處士

暢當

南充謝郡客遊澧州留贈宇文中丞云僕本濩落人辱  
當州郡使量力頗及早謝歸今即已蕭蕭若凌虛衿帶  
頓銷靡車服率然來涔陽作遊子鬱鬱寡開顏默默獨  
行李忽逢平生友一笑方在此秋情寧風日楚思浩雲  
水為語弋林者冥冥鴻遠矣



韋蘇州寄當詩云寇賊起東山英俊方未閑聞君新應  
募籍籍動京關出身文翰場高步不可攀青袍未及解  
白羽挿腰間昔為瓊樹枝今有風霜顏秋郊細柳道走  
馬一夕還丈夫當為國破敵如摧山何必事州府坐使

鬢毛班

問以子弟  
被召從軍

李端贈當詩并序云余少尚神仙且未能去友人暢當  
以禪門見導余心知其是而未得其門因寄詩以咨焉  
少喜神仙術年來久蹉跎壯志為一累浮生事漸多衰

顏不相識歲暮定相過請問宗居士君其奈老何

當河東人貞元初為太常博士後以果州刺史卒與弟  
諸皆有詩名

宿潭上云夜潭有仙舸與月當水中嘉賓愛明月遊子  
驚秋風

又云青蒲野陂水白露明月天夜中秋風起心事坐潛  
然

別盧倫云故交君獨在又欲與君離我有新秋淚非關

秋氣悲

平阿館赴郡云晨興平阿館見月沉江水溶溶山霧披  
肅肅沙鷺起奉恩謬符竹伏軾省頑鄙何得施教化愧  
迎小郡吏寥落耕俗地征途清冥裏德綏及吾民不得  
將鹿矣擒奸非性能多愍會衰齒恭承共理詔常懼墜  
諸地

居山居酬韋蘇州見寄云孤茅泄煙處此中山叟居觀  
雲寧有事耽酒詎知餘水定鶴翻去松歌峯儼如猶煩

使君問更欲結環廬

登鸛鵲樓云迴臨飛鳥上高出世塵間天勢圍平野河  
流入斷山

偶宴西蜀摩訶池云珍木鬱清池風荷左右披淺觴寧  
及醉慢舸不知移蔭竹簟光冷照流簪影歆胡為獨羈  
者雪涕向漣漪

當詩平淡多佳句如釣渚亭云花發多遠意見鴈有閑  
情遲暉耿不暮平江寂無聲天柱隱所云荒徑饒松子

深蘿絕鳥聲陽崖全帶日寬障偶通耕山居云水定鶴  
翻去松欹峯儼如又寒林苞晚橘風絮露垂楊湖畔聞  
漁唱天邊數鴈行皆有遠意

暢諸

早春詩云獻歲春猶淺園林未盡開雪和新雨落風帶  
舊寒來聽鳥聞歸鴈看花識早梅生涯知幾日更被一  
年催

獨孤及

字至之洛陽人時號獨孤常州夏中酬于逖畢耀問病  
見贈云救物智所昧學仙願未從行藏兩乖角蹭蹬風  
波中薄宦耻降志卧病非養蒙閉闕涉兩旬羈思浩無  
窮驚驚何處來雙舞下碧空離別隔雲雨惠然此相逢  
把手賀疾間舉杯欣酒濃新詩見久要清論激深衷高  
館舒夜簾開門延微風火雲赫嗟峨日暮千萬峯遙指  
故山笑相看撫號鐘聲和由心清事感由氣同出處未  
易料且歌緩愁容願君崇明德歲暮如青松

賈員外處見中書賈舍人巴陵詩集覽之懷舊代書寄  
贈云海岼望青瑣雲長天漫漫十年不一展知有關山  
難適逢阮始平立馬問平安取公詠懷詩示我江海瀾  
暫若歸武庫森然矛戟寒眼明遺頭風心悅忘朝餐大  
駕今返正熊羆扈鳴鑿公遊鳳凰沼獻可在筆端繫越  
有長纓封關祇一丸罔然翔寥廓仰望在羽翰嘉會不  
我與相思歲云殫惟當袖佳句持比青琅玕

題思禪寺上方詩云谿口聞法鼓停橈登翠屏攀雲到

金界合掌開禪局鬱律衆山抱空濛花雨零老僧指香  
樓云是不死亭眇眇于越路茫茫春草青遠山噴百谷  
繚繞馳東溟目極想何在境照心亦冥驕然諸根空破  
結如破瓶下視三界狹但聞五嶽腥山中有良藥吾欲  
隳天形

觀海詩云北登渤海島迴首秦東門誰尸造物功鑿此  
天地源瀕洞吞百谷周流無四垠廓然混茫際望見天  
地根白日自中吐扶桑如可捫迢迢蓬萊峰想像金臺



存秦帝曾經此登臨冀飛翻揚旌百神會望日羣仙奔  
徐福竟何成羨門徒空言唯見石橋足千里潮水痕  
及與薛華于遯畢耀友善安定梁肅叙其文曰天寶中  
作者數人頗節之以禮泊公為之於是操道德為根本  
摠經籍為冠帶以易之精義詩之雅興春秋之褒貶屬  
之為辭故其文寬而簡直而婉辯而不華博厚而高明  
論人無虛美比事為實錄天下凜然復覩兩漢之遺風  
善乎崔公祐甫之言曰常州之文以立憲誠世褒賢遏

惡為用故議論最長其或列于碑頌流於詠歌峻如嵩  
華盛於江河若贊堯舜禹湯之命為典為誥為謨為訓  
人皆許之而不吾試論道之位宜而不陟惜哉

皇甫冉

字茂政玄晏先生之後張曲江深愛之謂清穎秀拔有  
江徐之風大歷二年遷右補闕

冉題巫山云巫峽見巴東迢迢出半空雲藏神女館雨  
到楚王宮朝暮泉聲落寒暄樹色同清猿不可聽偏在

九秋中

丹少室昇仙歌云紅霞紫氣甚氤氲絳節青童迎少君  
忽從林下昇天去空使時人禮白雲

高仲武云皇甫冉補闕自擢桂禮闈遂為高格往以世  
道艱虞避地江外每文章一到朝廷作者變色於詞場  
為先輩推錢郎為伯仲誰家勝負或逐鹿中原如菓熟  
任霜封籬踈從水渡又裊露收新稼迎寒葺舊廬又驚  
知社日辭巢去菊為重陽冒雨開可以雄視潘張平揖

沈謝又巫山詩終篇皆麗自晉宋齊梁陳周隋已來採  
掇者無數而補闕獲驪珠使前賢失步後輩却立自非  
天假何以迨斯恨長轡未騁而芳蘭早凋悲夫

送韓司直云遊吳還適越來往任風波復送王孫去其  
如春草何岍明殘雪在湖滿夕陽多季子留遺廟停舟  
試一過

宿嚴維宅云昔聞玄度宅門向會稽峰君住東湖下清  
風繼舊蹤初秋臨水月半夜隔山鐘世路多離別良宵

詎可逢

途中送權暉

或作驛

云淮海風濤起江關憂思長同悲鵲

遶樹獨作鴈隨陽山晚雲和雪汀寒月滿霜由來濯纓

處漁父愛滄浪

西陵寄一公云西陵遇風處自古是通津終日空江上

雲山若待人汀洲寒事早魚鳥與同新南望山陰路吾

心有所親

姚合取四詩為極元集

獨孤至之叙其文云五言詩之源生於國風廣於離騷

著於李蘇盛於曹劉其所自遠矣當漢魏之間雖以朴散為器作者猶質有餘而文不足以今揆昔則有朱絃踈越大羹遺味之歎歷千餘歲至沈詹事宋考功始財成六律彰施五色使言之而中倫歌之而成聲緣情綺靡之功至是乃備雖去雅浸遠其利有過於古者亦猶路馭出於土鼓篆籀生於鳥跡也沈宋既沒而崔司勳顯王右丞維復崛起於開元天寶之間得其門而入者當代不過數人補闕其人也

冉題裴周新園云東郭訪先生西郊尋隱路久為江南  
客自有雲陽樹已得閑園心不知公府步開門白日遠  
倚杖青山暮菓熟任霜封籬疎從冰度窮年無牽綴往  
事惜淪悟惟見耦耕人朝朝自來去

送元盛還潛山云深山秋事早君去復何如裊露收新  
稼迎寒葺舊廬題詩即招隱作賦是閑居別後應相憶  
嵇康懶寄書

秋日東林之作云閑看秋水心無事卧對寒林手自栽

廬阜高僧留偈別茅山道士寄書來燕知社日辭巢去  
菊為重陽冒雨開淺薄將何稱獻納臨岐終日自遲迴  
送韋使君赴昇州云中司龍節貴上客虎符新地控吳  
襟帶才高漢搢紳泛舟因渡臘入境便行春何處歌來  
暮長江建業人

送李錄事赴饒州云北人南去雪紛紛鴈叫汀洲不可  
聞積水長天隨遠色荒林極浦足寒雲山從建業千峰  
起江自潯陽九派分借問督郵纔弱冠府中年少不如



君

皇甫曾

寄中書王舍人詩云腰金載筆謁承明至道安禪得此  
生西掖幾年綸綍貴東山遙夜薜蘿情風傳漏刻星河  
曙月上梧桐雨露清聖主好文誰為薦閉門空賦子虛  
成

送孔徵士云谷口山多處君歸不可尋家貧青史在身  
老白雲深掃雪開松徑踈泉過竹林餘生負耶壑相送

亦何心

烏程水樓留別云悠悠千里去惜此一樽同客散高樓  
上帆飛細雨中山程隨遠水楚思任青楓共說前期易  
滄波處處通

張芳見訪郊居云林中雨散早涼生已有迎秋促織聲  
三徑荒蕪羞對客十年衰老愧稱兄愁心自惜江籬短  
世事方看木槿榮君若罷官攜手日尋山莫算白雲程  
雲林邕上人云春山臨一室獨坐草淒淒身寂心成道

花開鳥自啼細泉松磬裏反景竹林西晚與門人別依  
依出虎溪

送中丞還京云罷戰迴龍節朝天見鳳池寒生五湖道  
春及萬年枝郡化多遺愛胡清已畏知懷恩偏感別墮  
淚向旌麾

贈需禪師云南嶽瀟湘沅吾師經利涉身歸沃洲老名  
與支公接靜教傳荆吳道緣止漁獵觀空色不染對境  
心自愜室中人寂寞門外山重疊天台積幽夢早歲歸

負笈

高仲武云昔孟陽之與景陽詩罔慙厥弟協居六品載處下流今侍御之與補闕文辭亦爾體制清潔華不勝文然寒生五湖道春及萬年枝五言之選其為士林所尚宜哉

曾字孝常為殿中侍御史天寶中兄弟踵登進士第名相上下時比張氏景陽孟陽云

尋陸處士云幾年人不見林下掩柴關留客當清夜逢

君話舊山隔城寒杵急帶月早鴻還南陌雖相近其如  
隱者閑

哭陸處士云從此無期見柴扉對雪開二毛逢世難萬  
恨掩泉臺返照當空久孤城吊客回漢家偏訪道猶畏  
鶴書來

送人作使云上將還專席雙旌復出秦關河三晉路賓  
從五原人孤戍雲連海平沙雪度春酬恩看玉劒何處  
有煙塵

尋陸處士詩以下三  
篇姚合取為極元集

曾與劉長卿友善曾過長卿碧澗別業詩云謝客開山  
後郊扉出去通江湖十年別衰老一樽同反照寒川滿  
平田暮雪空滄洲自有趣不復泣途窮長卿和云荒村  
帶晚照落葉亂紛紛古路無行客寒林獨見君野橋經  
雨斷澗水向田分不為憐同病何人到白雲

曾又寄長卿云南憶新安郡千山帶夕陽斷猿知夜久  
秋草助江長鬢髮應成素青松獨見霜愛才稱漢主題  
柱待田郎長卿和云離別江南北汀洲葉再黃路遙雲

共水砧迥月如霜歲儉修仁政

姑臧相國  
親臨郡

年衰憶故鄉

佇看宣室召漢法倚張綱

盧綸哭曾云攀龍與泣麟哀樂不同塵九陌霄漢侶一

燈冥冥人舟沉驚海濶蘭折怨霜頻已矣復何見故山

應更春

時同李包二  
郎哭曾故云

李幼卿

近日霜毛一番新別時芳草兩迴春不堪花落花開處  
況是江南江北人薄宦龍鐘心懶慢故山寥落水齋淪

緣君愛我疵瑕少願竊仁風寄老身

幼卿字長夫隴西人大厯中以右庶子領滁州別業在  
常州義興曰玉潭庄在滁州時以書託獨孤至之獨孤  
以詩寄云日日思瓊樹書書話玉潭知同百口累曷日  
辦抽簪又至之題玉潭云碧玉徒強名冰壺難比德唯  
當寂照心可並龡淪色幼卿所謂故山寥落水龡淪者  
也

蕭穎士樂聞人善以推引後進為己任如李陽冰李幼



卿皇甫冉陸渭輩由獎目皆為名士滁州迄今有庶子  
泉以幼卿得名也

趙驊

送晁補闕歸日本國云西掖承休澣東隅返故林來稱  
剡子學歸是越人吟馬上秋郊遠舟中曙海陰知君懷  
魏闕萬里獨搖心

驊字雲卿擢開元進士第嘗陷祿山貶晉江尉建中初  
為秘書少監與顏真卿蕭穎士等善其子宗儒

賈邑

蕭夫子赴東府門人送者十二人劉太真為之序云先  
師微言既絕者千有餘載至夫子而後洵美無度得夫  
天和項東倭之人踰海來賓舉其國俗願師於夫子弗  
敢私請表聞于天子夫子辭以疾而不之從也退然貧  
居述作萬卷去其浮辭存乎正言昔左氏失於煩縝梁  
失於短公羊失於俗而夫子為其折衷王公交辟拒而  
不應從官三年始參謀於洛京家兄與先鳴者六七人

奉壺開筵執弟子之禮於路左太真以文求進以無聞  
見舉而不恡為夫子羞春雲輕陰草色新碧皎皎疋馬  
出于青門吾徒喟然瞻望不及賦詩仰餞者自相里造  
賈邕已下凡十二人皆及門之選也

邕得路字云子欲適東周門人盈岐路高標信難仰薄  
宦非始務綿邈千里途徘徊四郊暮征車日云遠撫已  
慙深顧

邕天寶九年李暉侍郎下登第

劉舟

一作舟

得適字云大名掩諸古獨斷無不適德遂天下宗官為  
幕中客驪山浮雲散霸岬零雨夕請業非遠期圓光再  
生魄

天寶十六年陽浚舍人下登第

長孫鑄

得離字云大德詎可擬高梧有長離素懷經綸具昭世  
猶安卑落日去關外悠悠隔山陂我心如浮雲千里相

追隨

天寶十二年陽浚舍人下登第

房白

得還字云夫子高世跡時人不可攀今予亦云幸謬得承溫顏良策資入幕遂行從近闕青春灞亭上此去何時還

天寶十三年陽浚侍郎下登第

元晟

得引字云吾見夫子德誰云習相近數仞不可窺言味  
終難盡處喧慮常澹作吏心亦隱更有嵩少峰東南為  
勝引

晟河南府進士

劉太冲

得淺字云吾師繼微言贊述在墳典寸祿聊自資平生  
宦情鮮逶遲東周路春草深復淺日遠夫子門中心曷  
由展

天寶十二年陽浚舍人下登第

姚發

得草字云天生良史筆浪跡擅文藻中夏授參謀東夷  
願聞道行軒翫春日餞席藉芳草幸得師季良欣留篋  
笥寶

天寶十二年陽浚舍人下登第

鄭愕

得往字云斤溪數畝田素心擬長往翳君曲得引使我

櫻俗網風塵豈不勞道義成心賞春郊桃李月忍此戒  
征兩

天寶十二年陽浚舍人下登第

殷少野

得散字云官閉幕府下聊以任縱誕文學魯仲尼高標  
秘中散出門時雨潤對酒春風暖感激知己恩別離魂  
欲斷

天寶十二年陽浚舍人下登第



鄔載

不預此會

得君字云策名十二載獨立先斯文邇來及門者半已  
昇青雲青雲豈無姿黃鶴素不羣一辭芸香吏幾歲滄  
江瀆散職既不羈天聰亦昭聞雖承急賢詔未謁陶唐  
君薄俸還自急此言那足云和風媚東郊時物滋南薰  
蕙草正可摘豫章猶未分宗師忽千里使我心氛氲  
天寶十三年陽浚侍郎下登第

穎士留別二三子得韻字云二紀尚雌伏徒然忝先進

英英爾衆賢名實鬱雙振殘春惜將別清洛行不近相  
與愛後時無令孤逸韻

鄔載有文名與錢起友善起同載旅寓關中起有詩云  
文士皆求遇今人誰至公靈臺一寄宿楊柳再春風更  
惜忘形友頻年失志同羽毛齊燕雀心事阻鴛鴻留滯  
慙歸養飛鳴恨觸籠橘懷鄉夢裏書去客愁中殘雪送  
歸鴈韶光棄斷蓬吞悲問唐舉何路出屯蒙

又送鄔三落第還鄉云郢客文章絕世稀常嗟時命與

心違十年失路誰知己千里思親獨遠歸雲帆春水將  
何適日愛東南暮山碧關中新月對離樽江上殘花待  
歸客名宦無媒自古遲窮途此別不堪悲荷衣垂釣且  
安命金馬招賢會有時

劉長卿過鄒三湖上書齋云何事東林客忘機一釣竿  
酒香開甕老湖色對門寒向郭青山送臨池白鳥看見  
君能浪跡予亦厭微官

唐詩紀事卷二十七

欽定四庫全書

集部

唐詩紀事卷

二十八  
主  
三十

詳校官監察御史臣沈孫璉

主事銜臣徐以坤覆勘

覆校官中書臣呂雲棟

校對官原任典簿臣郭祚熾

謄錄監生臣陳際龍

謄錄貢生臣李璜

欽定四庫全書

唐詩紀事卷二十八

宋 計敏夫 撰

張濯

孫叔向

朱長文

胡令能

鄭丹

李希仲

杜誦

鄭錫

古之奇

秦系

令狐峘

楊凌

劉大真

顧況

薛業

劉希戩

朱絳

元凜

楊志堅

劉方平

李揆

戎昱

張濯

題舜廟云古都遺廟出山濱萬代千秋仰聖君蒲阪城  
邊長逝水蒼梧野外不歸雲寥寥象設魂應老寂寂虞  
篇德已聞向晚風吹庭下柏猶疑琴曲韻南薰

濯登上元進士第

孫叔向

題昭應溫泉云一道溫泉遶御樓先皇曾向此中遊雖  
然水是無情物也到宮前咽不流

送咸安公主云  
鹵簿遲遲出國門  
漢家公主嫁烏孫  
玉顏使向穹廬去  
衛霍空承明主恩

咸安德宗女元和時追封燕國襄穆公主

朱長文

吳興送梁補闕歸朝賦得荻花云  
柳家汀洲孟冬月  
雲寒水清荻花發  
一枝持贈朝天人  
願比蓬萊殿前雪

春眺揚州西崗寄徐員外云  
蕪城西眺極蒼流  
漠漠春煙間曙樓  
瓜步早潮吞建業  
蒜山晴雪照揚州  
隋家故

事不能問鶴在山池期我遊

望中有懷云龍向洞中啣雨出鳥從花裏帶香飛白雲  
斷處見明月黃葉落時聞擣衣

宿新安江深渡館寄鄭州王使君云霜飛十月中搖落  
衆山空孤館閉寒木大江生夜風賦詩忙有意沈約在  
關東

送李司直歸浙東幕兼寄鮑將軍云翩翩書記早曾聞  
二十年來願見君今日朝廷想白髮同時幾許在青雲



人從北固山邊去水到西陵渡口分會作王門曳裾客

為余前謝鮑將軍

時節度大夫初封東平郡王

長文大厯間江南詩人

胡令能

詠綉障云日暮堂前花藥嬌爭拈小筆上床描繡成安  
向春園裏引得黃鶯下柳條

小兒垂釣云蓬頭稚子學垂綸側坐莓苔草映身路人  
借問遙招手恐畏魚驚不應人

喜圃田韓少府見訪云忽聞梅福來相訪笑着荷衣出  
草堂兒童不慣見車馬爭入蘆花深處藏

令能莆田隱者少為負局鉸釘之業以所居列子之里  
家貧遇茶果必祭列子以求聰明或夢人割其腹以一  
卷書內之遂能吟詠禪學尤邃世謂胡釘鉸者也貞元  
元和間人

鄭丹

肅宗挽歌云國以重明受天從諒闇移諸侯方北面白

日又西馳龍影當泉落鴻名向廟垂永言青史上還見  
載無為

明皇挽歌云律歷千年會車書萬里同固期常戴日豈  
意厭觀風地慘新疆理城摧舊戰功山河萬古壯今夕  
盡歸空

高仲武云鄭丹詩剪刻婉密寶應中獻二帝兩后挽歌  
三十首詞旨哀楚得臣子之致雖不及事朝廷嘉之解  
褐蘄州錄事參軍二章其尤者也

丹大厯間詩人

李希仲

東皇太一詞云吉日初齋戒靈巫穆上皇焚香布瑤席  
鳴珮奠椒漿緩舞花飛滿清歌水去長迴波送神曲雲  
雨滿瀟湘

薊北行云旄頭有精芒敵騎獵秋草羽檄南渡河邊庭  
用兵早漢家愛征戰宿將今已老辛苦羽林兒從戎榆  
關道一身救邊速烽火通薊門前軍飛鳥斷格鬪塵沙

底寒日鼓聲急單于夜將奔當須徇忠義身死報國恩  
高仲武云希仲輕靡華勝於質此所謂才力不足務為  
清淺者也然前軍飛鳥斷格鬪塵沙昏亦出塞錄疊疊  
不歇可及中矣

希仲趙郡人天寶初宰偃師范陽趙戎挈家避亂入江  
淮

杜誦

誦哭長孫侍御云道為謀猷重名因賦頌雄禮闈曾擢

桂憲府既乘驄流水生涯盡浮雲世事空惟應舊松栢  
蕭颺九原中

高仲武云誦詩平調不失文流如流水生涯盡浮雲世  
事空得生人始終之理故編於集

誦大厯間詩人也

鄭錫

邯鄲少年行云霞鞍金口騶豹袖紫貂裘家住叢臺下  
門前漳水流喚人呈楚舞借客試吳鉤見說秦兵至甘

心赴國讎

李嘉祐與錫遊春詩云東門垂柳長回首獨心傷日暖  
臨芳草天晴憶故鄉映花鶯上下過水蝶悠颺借問同  
行客今朝淚幾行李端司空曙皆錫友也

錫登寶應進士第寶歷間爲禮部員外郎

事見李翱所撰李長史墓

銘

古之奇

秦人謠云微生祖龍代却思堯舜道何人仕帝庭拔殺

指佞草姦臣弄民柄天子恣衷抱上下一相蒙馬鹿遂  
顛倒中國既板蕩骨肉安可保人生貴年壽吾恨死不  
早

李端送之奇赴涇州幕云疇昔十年兄相逢五校營今

宵舉盃酒隴月見軍城

時從馬  
僕射辟

之奇登寶應進士第

秦系

系呈韋蘇州詩云久卧雲間已息機青袍忽著狎鷗飛



詩興到來無一事郡中今有謝元暉

系字公緒會稽人隱泉州南安九日山張建封聞系不  
可致就加校書郎自號東海釣客與劉長卿善權德輿  
曰長卿自以爲五言長城系用偏師攻之矣韋荅系曰  
知掩山扉三十秋魚鬚翠碧葉床頭莫道謝公方在郡  
五言今日爲君休蓋系以五言得名久矣年八十餘卒  
南安人號其峰爲高士峰

系將移耶溪舊居留呈嚴長史陳校書允初云鷄犬漁

舟裏長謠任興行即今邀客醉已被遠山迎書笈將非  
重荷衣着甚輕謝安無箇事忽起爲蒼生

山中贈張評事時授右衛佐云終年常避喧自注五千  
言流水閑過院春風與閉門山茶邀上客桂實落前軒  
何事教予起微言不足論

系家剡山向盈一紀大歷五年人或以其文聞於留守  
薛公無何奏系右衛率府倉參軍意所不欲以疾辭免  
因將命者獻詩云由來那敢議輕肥散髮行歌自採薇

逋客未能忘野興  
辟書令遣脫荷衣  
家中匹婦空相笑  
池上羣鷗盡欲飛  
更乞大賢容小隱  
益看愚谷有光輝  
系曾與鮑員外同舉場  
因其見尋呈情云  
少小爲儒不自強  
如今復嬾見侯王  
覽鏡自知身漸老  
買山將作計偏長  
荒涼鳥獸同三逕  
撩亂琴書共一床  
猶有郎官來問病  
時人莫道我徉狂

山中寄錢起苗發云  
空山歲計是胡麻  
窮海無梁泛一槎  
幼子唯能覓梨栗  
逸妻相共老煙霞  
高吟麗句驚巢

鶴閑閑春風看落花借問省中何水部今人幾箇屬詩家

令狐峒

儒服學從政遂爲塵事嬰銜命東復西孰堪異鄉情懷  
祿且懷恩策名敢逃名羨彼農畝人白首親友并江山  
入秋氣草木彫晚榮方塘寒露凝旅館涼飈生懿交守  
東吳夢想聞頌聲雲水方浩浩離憂何時平

右令狐峒寄韋蘇州詩峒德棻五世孫天寶末第進士

宰相楊炎故出杜鴻漸門下其子封求洪文生以託岷  
岷曰必得公手書得書即奏之炎具奏所以然德宗曰  
姦人也自禮侍貶衡州別駕

岷介懷人以爲怨

韋蘇州荅岷詩云一凶乃一吉一是復一非孰能逃斯  
理亮在識其微三黜故無愠高賢當庶幾但以親交戀  
音容邈難希况惜別離久俱忻蕃守歸朝晏方陪厠山  
川又乖違吳門冒海霧峽路凌連磯同會在京國相望  
涕沾衣明時重英才當復別彤闈白玉雖塵垢拂拭還

光輝

頃再謫三衢遇田敦爲牧乃門生也方相見敦曰吾今日方見座主乃分半俸奉之

楊凌

淮陽爲郡暇坐惜流芳歇散懷累榭風清暑澄潭月陪燕辭三楚戒途綿百越非當遠別離雅奏何由發

右楊凌詩韋應物刺滁州凌時以協律客滁州既別韋寄詩云吏散山閣掩鳥鳴山郡中遠念長江別俯覺坐

隅空舟泊南池雨簾捲北樓風併罷芳罇燕鳥愴昨時  
同故凌以前詩謝之

凌明妃怨云漢國明妃去不還馬駝絃管向陰山匣中  
縱有菱花鏡羞對單于照舊顏

凌字恭履最善文章大曆中與兄憑凝踵進士第時號  
三楊凌終侍御史子敬之

劉太真

寵至乃不驚罪及非無由奔迸歷畏途緬邈赴偏陬牧

此彫弊毗屬當賦歛秋風興諒無補旬暇焉敢休前日  
懷友生獨登城上樓迢迢西北望遠思不可收今日車  
騎來曠然銷人憂晨迎東齋飯晚度南溪遊以我碧流  
水泊君青翰舟莫將遷客程不爲勝景留飛札謝三守  
斯篇希見酬

右劉太真詩太真刺信州時顧十二左遷過上饒出韋  
蘇州房杭州韋睦州三使君詩太真繼焉太真宣州人  
師蕭穎士蕭云太真吾入室者也正元四年德宗詔羣



臣宴曲江自爲詩羣臣皆和帝自第之以太真李紆等  
爲上鮑防于邵等次之張蒙等爲下與擇者四十二人  
韋蘇州荅太真詩云瓊樹凌霜雪葱蒨如芳春英賢雖  
出守本自玉階人宿昔陪郎署出入迎清塵孰云俱列  
郡比德豈爲隣其見重如此

顧況

況字逋翁姑蘇人至德進士性詼諧與柳渾李泌爲方  
外友德宗時渾輔政以秘書郎召及泌相自謂當得達

官久之遷著作郎况坐詩語調詭貶饒州司戶居於茅山以壽終皇甫湜爲况文集序云偏於逸歌長句駿發蹕厲往往若穿天心出月脇意外驚人語非尋常所能及最爲快也其爲人類其詞章云

况志尚踈逸近於方外時宰招以好官况以詩荅云四海如今已太平相公何用喚狂生此生還似籠中鶴東望瀛州叫一聲

上柳相公

子規詩云棲霞山中子規鳥口邊血出啼不了山僧夜

後初入定聞似不聞山月曉

露青竹杖歌云鮮于仲通正當年章仇兼瓊在蜀川約  
束蜀兒採馬鞭蜀兒採鞭不敢眠橫截斜度飛鳥邊繩  
橋夜上層崖巔頭挿白雲跨飛泉採得馬鞭長且堅浮  
漚丁子珠聯聯灰煮蠟揩光爛然章仇兼瓊持上天  
上雨露何其偏飛龍閑廐馬數千朝飲吳江夕秣燕紅  
塵撲轡汗濕韉師子麒麟聊比肩曲江昆明洗刷牽四  
蹄踡浪頭枿天蛟龍稽顙河伯虔拓羯胡鷄脚手鮮陳

閨韓幹丹青妍欲貌未貌眼欲穿金鞍玉勒錦連乾騎  
入桃花楊柳煙十二樓中奏管絃樓中美人奪神仙爭  
愛大家把此鞭祿山入關關破年忽見揚州比郎前祇  
有人還千一錢亭亭筆直無皺節磨捋形相一條鐵市  
頭終是無人別江海賤臣不拘綈垂綃挂影西窻缺稚  
子覓衣挑仰穴家僮拾薪幾拗折玉閨猶霑玉壘雪碧  
鮮似染萇宏血蜀帝祠邊子規咽相如橋上文君絕往  
年策馬降至尊七盤九折橫劒門穆王八駿超崑崙安

用冉冉孤生根聖人不貴難得貨金玉珊瑚誰買思

况攻小筆嘗求知新亭監人詰之曰余要貌海中山耳  
仍辟畫省王默爲副任職半年解後落筆有奇趣山中  
作云野人愛向山中宿况在葛洪丹井西庭前有箇長  
松樹半夜子規來上啼况又有汀洲渺渺江籬短短疑是  
疑非兩斷腸句巫峽朝雲暮不歸洞庭春水晴空滿句  
顏垣化爲陂陸地堪乘舟句大姑山盡小姑出月照洞  
庭行客船句

右張爲取作主客圖

代佳人贈別云萬里行人欲渡溪  
千行珠淚滴爲泥已  
成殘夢隨君去猶有驚鳥半夜啼

秋題葉道士山房云水邊垂柳赤欄橋  
洞裏仙人吹玉簫  
近得麻姑書信否潯陽江上不通潮

金鎗玉珮歌云贈君金鎗太霄之玉佩  
金鎖禹步之流珠  
五嶽真君之秘錄九天丈人之寶書  
東井沐浴辰已畢  
先進洞房上奔日  
借問君從何處來  
黃姑織女機邊

出

悲歌三首并序云情思發動聖所不免也故師乙陳其  
宜延陵審其音理亂之所經王化之所興信無逃聲豈  
徒文彩之麗遂作歌以悲之云邊城路今人犁田昔人  
墓岬上沙昔時江水今人家今人昔人共長歎四氣相  
催節迴換明月皎皎入華池白雲離離渡青漢我欲昇  
天天隔霄我欲渡水水無橋我欲上山山路險我欲吸  
井井泉遙越人翠被今何夕獨立沙邊江草碧紫燕西

飛欲寄書白雲何處蓬萊客

新繫青絲百尺繩  
心在君家轆轤上  
我心皎潔君不知  
轆轤一轉一惆悵  
何處春風吹曉幕  
江南淶水通珠閣  
美人二八顏如花  
泣向春風畏花落  
臨春風聽春鳥別  
時多見時少  
愁人一夜不得眠  
瑤井玉繩相對曉

軒轅黃帝初得仙  
鼎湖一去三千年  
周流三十六洞天  
洞中日月星辰聯  
騎龍倒景遊八極  
軒轅弓劍無人識  
東海青童寄消息



八月五日歌云四月八日明星出摩耶夫人降千佛八  
月五日佳氣新昭成太后出聖人開元九年燕公說奉  
詔聽置千秋節丹青廟裏貯姚宋花萼樓中宴岐薛清  
樂靈香幾處聞鸞歌鳳吹動祥雲已於武庫見靈鳥仍  
向晉山逢老君率土溥天無不樂河清海晏窮寥廓梨  
園弟子傳法曲張果先生進仙藥玉座淒涼遊帝京悲  
翁回首望承明雲韶九奏杳然遠唯有五陵松柏聲  
洞庭秋日云青草湖邊日影低黃茅嶂裏鷓鴣啼丈夫

飄蕩今如此一曲狂歌楚水西

薛業

洪州客舍寄柳博士芳詩云去年燕巢主人屋今年花  
發路傍枝年年爲客不到舍舊國存亡那得知邊塵一  
起天下亂何處春風無別離

晚秋贈張折衝詩云都尉今無事時清但閉關夜霜戎  
馬瘦秋草射鵬閑位以穿楊得名因折桂還馮唐真不  
遇嘆息鬢毛班

獨孤常州送薛處士業遊廬山序云薛侯敦於詩困於學敏於行時然後言言而寡尤口弗言祿祿亦不及識其真者以爲永嘆而薛侯居之澹如君子哉若人也拂纓上之塵西遊廬山趙補闕驛王侍御定張評事有略各以文爲贈余亦持片言用代踈麻瑤華之贈

劉希戩

彈琴詩云碧山本岑寂素琴何清幽彈爲風入松岬谷  
颺以秋庭鶴舞白雪泉魚躍洪流余欲娛世人明月難

暗投感歎未終曲淚下不可收  
嗚呼鍾子期零落歸山  
邛死而若有知魂兮從我遊

朱絳

春女怨云獨坐紗窻刺綉遲  
紫荊枝上轉黃鸝欲知無  
限傷春意併在停針不語時

顧陶取此書爲類選

元凜

九日對酒云嘉辰復遇登高臺  
良朋笑語傾金壘煙攤

秋色正堪翫風惹菊香無限來未保亂離今日後且謀  
歡洽玉山頽誰知靖節當時事空學狂歌倒載迴

中秋夜不見月云蟾輪何事色全微賺得佳人出綉幃  
四野霧凝空寂寞九霄雲鎖絕光輝吟詩得句翻停筆  
翫處臨樽却掩扉公子倚欄猶悵望懶將紅燭草堂歸

### 楊志堅

顏魯公爲臨川內史邑有楊志堅者嗜學而貧妻厭之  
一日告離志堅以詩送之曰平生志業在琴詩頭上如

今有二絲漁父尚知谿谷暗山妻不信出身遲荆釵任  
意撩新鬢明鏡從他別畫眉今日便同行路客相逢即  
是下山時持詩詣州請公牒求別醮顏公案其妻曰王  
歡之廩既虛豈遵黃卷朱叟之妻必去寧見錦衣污辱  
鄉閭敗傷風俗若無褒貶僥倖者多遂箠之後無棄其  
夫者

劉方平

秋夜汎舟云林塘夜汎舟蟲響荻颼颼萬影皆因月千

聲各爲秋歲華空復晚鄉思不堪愁西北浮雲外伊川  
何處流

皇甫冉寄方平詩云十年不出蹊林中一朝結束甘從  
戎嚴子持竿心寂歷寥落荒籬遮舊宅又曰與君從來  
同語默豈是悠悠但相識天伴三秋空復情袖中一字  
無由得

方平春怨云紗窻落日漸黃昏金屋無人見淚痕寂寞  
空庭春又晚梨花滿地不開門

方平汎舟思鄉云西北浮雲外伊川何處流蓋洛中人  
也皇甫冉之京留別方平詩云遲遲越二陵迴首但蒼  
茫喬木清宿雨故闌愁夕陽冉嘗爲河南從事自是遷  
左拾遺留別於河南也

方平與元魯山善不仕蓋邢襄公政會之後也蕭穎士  
云山東茂異有河南劉方平

李揆

揆與饒州刺史封漸仲容叔霽連句揆筆力道媚有免



相踐蓬閣卧痾淮海濱偶逢潘川守宛是潘楊親又云  
共仰新侯伯同瞻舊宰臣又云鄉路轅思北家林巷喜

南

出江鄰  
幾雜志

前定錄云有巫者告揆曰公當爲拾遺遺以一書緘之  
云得此官即開後明皇召試紫絲盛露囊賦果得拾遺  
啓緘即此賦也

戎昱

憲宗朝北狄頻入邊大臣奏議古者和親有五利而無

千金之費帝曰比聞有士子能爲詩而姓名稍僻是誰  
宰相對以包子虛冷朝陽皆非也帝遂吟曰山上青松  
陌上塵雲泥豈合得相親世路盡嫌良馬瘦唯君豈合  
卧龍貧千金未必能移性一諾從來許殺身莫道書生  
無感激寸心還是報恩人侍臣對曰此是戎昱詩也京  
兆尹李鑾擬以女嫁昱令其改姓昱固辭焉帝悅曰朕  
又記得詠史一篇云漢家青史內計拙是和親社稷因  
明主安危託婦人豈能將玉貌便欲靜胡塵地下千年

骨誰爲輔佐臣帝笑曰魏絳之功何其懦也大臣遂息  
和戎之論矣

塞上曲云樓上盡角哀即知兵心苦試問左右人無言  
淚如雨何意值明時終年事鼙鼓

長安秋夕云八月更漏長愁人起常早閉門寂無事滿  
地生秋草昨宵西窻夢先入荆門道遠客歸去來在家  
貧亦好

昱在零陵于襄陽聞有妓善歌取之昱以詩遣行曰寶

鈿香娥翡翠裙粧成掩泣欲行雲慙懃好取襄王意莫  
向陽臺夢使君于遂遣還昱登進士第衛伯玉鎮荆南  
辟爲從事後爲辰虔二州刺史

昱贈別張駙馬云上元年中長安陌見君朝下欲歸宅  
飛龍騎馬三十疋玉勒彫鞍照初日數里衣香遙撲人  
長衢雨歇無纖塵從奴斜抱勅賜錦雙雙蹙出金麒麟  
天子愛壻皇后弟獨步明時負權勢一身扈蹕承殊澤  
甲第朱門聳高戟鳳凰樓上伴吹簫鸚鵡杯中醉留客

泰去否來何足論宮中晏駕人事翻一朝負譴辭丹闕  
五年待罪湘江源冠冕淒涼幾遷改眼看桑田變成海  
華堂金屋別賜人細眼黃頭揔何在渚宮相見寸心悲  
懶欲今時問昔時看君風骨殊未歇不用愁來雙淚垂

肅宗張皇后弟清潛尚大寧延和二郡  
公主代宗立廢后爲庶人清潛皆放流

寶應中過滑州洛陽後同王季友作苦哉行詩云妾家  
清河邊七葉承貂蟬身爲最小女偏得渾家憐親戚不  
相識幽閨十五年有時最遠出祇到中門前前年狂敵

來懼死翻生全今秋官軍至豈意遭戈鋌匈奴爲先鋒  
長鼻黃髮拳鬬弓獵生人百步牛羊羶脫身落虎口不  
及歸黃泉苦哉難重陳暗哭蒼蒼天

採蓮曲云雖聽採蓮曲詎識採蓮心漾櫂愛花遠回船  
愁浪深煙生極浦色日落半江陰同侶憐波靜看粧墮  
玉簪潯陽女兒花滿頭毵毵同泛木蘭舟秋風日暮南  
湖裏爭唱菱歌不肯休

唐詩紀事卷二十八